

恩福堂筆記

述事賦

有序

吉林英和撰

昔祖德是詠紀新製於陸機述初有篇振奇詞於
梁肅箕裘所自永世勿諼和系出襄鐘家傳孔鼎
軒冕相襲八葉於茲雖事載史成名在官閥而遺
聞軼事盛嫩難賅爰追溯典型布之章句用以示
我子孫俾無忘先澤云

繫

鴻圖之肇興仰方輿之式廓從龍虎於風雲集英
賢於鎬洛溯遷邑於余家傷本枝之孔弱訪長史

之姻舊旗紅白以交錯

高高祖驍騎公弱齡奉母入燕京投親於姑丈睿忠

親王長史巴拜處

送隸鑲白旗滿州隸內府而拜職司左藏之鎖鑰

悵歲月之逾邁旋棄官而溥落爰從事於戎韜藉

弧矢之卓犖厠虎士以從征晉騎郎而橫槊

旋改隸內

務府滿洲長授六品司庫之職因公落憤蚩尤之

亂涿同有扈之戰甘殲銅頭之驍悍驅鐵騎之趁

趲惟我祖之效命奮威烈於霜鐔經膚施之古邑

偶拄策於茅檐邁東道之賢主乃適館而受餐獻

豆粥與麥飯見子女之兩三指一人曰佳耦願鳴

鳳之諧占遂繫絲於異地待凱奏而迴驂果功成
於一戰歌琴瑟兮樂耽惟夫人之穎異聆

國語兮能諳洵徽音之令淑符蘭夢以宜男

從親藩將

軍征西客於陝西膚施縣張公家公出子女見王
擇一女配焉唱凱言歸公送女至京台巷未半載

夫人清語卽熟
有滿洲古風

資政篤生幼而歧嶷膺

賜姓以亢宗竭匪躬以盡職

高祖資政公康熙年
賜姓氏見於

受姓紀畧

張審通之異稟宮之奇之侍側受耳目之委

寄襄文武之碩畫漸席厚而履豐更錫田而賜帛
儼封邑之多戶納租稅而食力惟紅粟之充盈非

隸首所能測命小鬟而負荷羌委地而勿惜資政公於

康熙間

恩眷特深

賜予便蕃不能

以數計其時帶地投充莊戶若干姓每秋納解租

銀僕婦引小鬟自儀門肩入內鬟以壓肩委其半

於地應役而散不復拾取余十餘齡時有老嫗述

其事如繪嫗卽當年秉松竹兮爲心集道義兮成

小鬟已八十餘歲矣

性潔素履而冰清湛虛懷而玉映嘗樂善而博施

行忠信與篤敬無黨無偏不絀不競絕讒口以自

矢信我生之有命資政公兼奏機密事任常示子孫我不以攻人之短以效己長

是有命焉故絕不談人陰昧事卜牛眠而輕將相望後嗣之有俊

英人所棄而獨取聞堪輿之頌聲惟識力之堅定

遂卜吉於佳城知厚福之必報宜奕葉之簪纓

地卜

於東直門外亮馬橋原
委見於恩福堂筆紀

光祿繼起兩代未仕借詩

酒以陶情守琴書而自喜金蘭結契於山林塤篪

迭奏夫宮徵曰溪曰村地皆東指舉孝廉以開先

謝徵辟而不悔

謂大伯祖東溪公開科二
伯祖舉賢良方正不就事

問律呂

於州鳩定測量於周髀嚴訓誥於椿庭曰親課夫

書史滋培既厚流澤乃長芝蘭蔚起肯構肯堂緊

科名之鼎盛聿首創於文莊未弱冠而登第凌紫

清而迴翔負嚴徐之重望薰班馬之濃香聿西清

之侍直徵殊遇於玉堂傍北扉而視草燦蓮炬之
成行遂頻司夫衡鑑厯坊苑而騰驤貳冬官而贊
治司會府之儲藏督黃圖之學校比衣錦於故鄉
惟

天心之眷篤乃倚重夫巖疆珠海波澄銅山地峻
戢奸宄以肅清撫蒸黎而豫順方化澤之久覃忽
蓼莪之抱恨襄啟事以心清董漕儲而運迅偶借
寇乎榕城亦威稜之遠鎮

帝心簡在夙夜惟寅昇秩宗之華秩和上下兮神

人統容臺而典重賁吉羽而儀新

禁垣策騎講席敷茵艷禮闈之五典樹桃李於陽
春有三元之入彀曰事

君兮得人抱孤忠之耿耿立朝右而垂紳亦惟文
恭並稱競爽玉樹聯芳銅盤居長志共勵於鷄窗
名同登於虎榜並棲鳳沼之旁俱荷龍池之賞振
鼎呂之元音發英威之盛響聿內直於邇英潤
皇猷而克廣獨坐榮躋三階曜朗惟棣華之接踵
咸踰濟於鸞班侍郎宣猷於遼瀋監司著績於百

蠻羨鹿鳴之再赴輝卿月以彈冠邁星珠之紀實
軼經緯之誇韓此又積善之餘慶而氏族因以根
蟠者也繫余小子舊澤是承衍鳳毛而襲慶親鯉
對以服膺勵宵燈以焯掌爰弱冠而賓興擧春官
之上第翔壁府以騫騰嗣前徽以繼武凜駿烈之
繩繩邈矣臣微

明哉

主聖眷舊德以罔訾推

湛恩於子姓

選材則名擢鑾坡課士則任分冰鏡棲鷄樹而三
遷厯鸞臺之五正直西府兮襄猷侍

南齋兮依詠近

光則日月爲昭承

詔則星雲互映總領詞垣兼司戎政銘

聖澤之淪肌惕鵜濡之未稱聿我

皇之繼序軼虞夏而并包建善旌而才進懸諫鼓
而賢招金椎治肅玉鏡光昭伊軫材之譎劣荷
元化之甄陶董金倉之大政總太府之繁條

許中樞之再入對前席而揮毫敢託知於水石幸
承渥於

雲霄海運則采之葑菲軍儲則籌及芻蕘寄鈞衡
之重任敢玩愒以辭勞惟汲深而綆短終負愧於
中宵念經訓之傳家尙貽型於孫子題鵠筆以聯
鑣謁金門而接趾或躋秩於卿僚或濫竽夫匪使
暨蠟鳳之稱奇亦分榮乎柱史四世翰林七科進
士數流慶之蟬嫣幸無忝於宗祀溯余家之原始
實奮迹於吉林涉松花之巨浸度弗辣之高岑自

歸誠而遇

主傳累葉之腰金擬椒聊之繁衍誇竹立之森森
職盡思夫補袞功有待於爲霖軼燕山之桂樹羨
王氏之槐陰惟

天恩與祖澤禕百世而同欽詩頌熾昌族期滋大
願益迪夫前光幸躬逢夫嘉會思冲抑以持盈常
省躬以戒汰端嚴聿著夫衣帽敬慎恒昭於結綈
凜金心之在中矢石腸兮介外惟作善之降祥厯
孫曾而永泰此又祖訓之貽留而亟當銘之几帶

者也繫大鈞之播物每榮瘁之殊塗或優游於鐘
鼎或跼伏於菰蘆或父書之難讀或祖硯之終枯
每縈懷夫明發念先烈之易渝何軒輶之相映得
光曜於駟閭思盛滿兮難居戒矜夸兮易蹟際
聖澤之高深得優游於里肆惜光景於桑榆寄幽
情於荷芰偕野老兮歌衢聽生徒兮問字謹嗣服
於

三朝聿撝觚而述志思彝訓之難忘寶榮名之不
墜願作則於雲初永無斁兮奕世

恩福堂筆記卷上

吉林英和撰

和自中第後每次引

見必蒙

純廟垂問數言授侍講曰

命恭和

聖製觀麥七古一首阿文成公攜至軍機處公上
坐令余對坐親視揮毫詞林稱爲佳話嘉慶二年
以

恩示宮室言
日講官扈從灤河

召見時

面加獎諭有加

恩之意事雖寢終身頂戴不忘

嘉慶四年春和初蒙

睿廟召對諭曰汝家事朕皆深悉惟當日和珅如何欲與汝締婚汝父何言以謝其直陳無隱對曰臣年八歲時和珅初爲侍郎至臣家適遇臣於門外但問臣年幾何別無他語及臣十一歲一日臣

父散直與臣母云白髮夫妻日增老境當早爲兒授室計今日在公所見八旗秀女中有原任漕督阿思哈之女薩克達氏未經記名可卽通媒妁併定於十三歲來歸此外別無所聞迨臣父亡後大學士公阿桂向臣言當日和珅倩內務府大臣金簡爲和珅之女作伐臣父婉辭阿桂稔知其事上嗟嘆久之

諭云汝父生前受和珅之謗多矣因泣對曰不獨生前受謗身後遺摺尙爲遏抑次日卽蒙

特恩賜謚文莊併先世父亦追謚文恭文恭公與文莊公於乾隆丙辰丁巳以嫡堂兄弟聯捷同入詞垣後掌翰林院事充教習庶吉士典鄉會試皆更替爲之當時有二難之稱及身後猶同沐

寵榮

眷念之深施及泉壤至今思之猶感激涕零罔知所報

和自乾隆癸丑通籍後不數年間忝躋卿貳至嘉慶甲子任戶部侍郎與大興朱文正公同掌翰林

院事是歲仲春

睿廟臨幸翰林院和恭逢盛典賡詩拜

賜與諸臣同而逾格

殊施加一品補服章身之

榮已覺非分復蒙

御筆書清華勵品額以

賜并

命懸之私室書生遭際千古一時感戴之忱有非
筆墨所能罄述者謹瓣香供奉永爲世寶

和遭逢

睿廟知遇之真眷顧之重刻骨難忘數十年中凡授一職拜一

賜均一一載入年譜中非敢誇耀閭里炫赫士林蓋以紀

恩榮矢報稱也迨嘉慶庚辰和年五十入春後次子奎耀任通政使每遇奏事之期卽蒙

召對屢詢以汝父今年五十歲記是四月十四日生辰奎耀退直爲和述之竊念

聖心垂注微臣恐馬齒加增疲於驅策耳至四月朔

賜對諭曰前問奎耀知汝今年五十歲欲

賜汝以詩汝當預備迎接使臣隨泥首對曰臣自問何人仰沐

生成至優極渥鞠躬盡瘁圖報維艱恐

主上恩深臣下福薄逾分之榮滿盈是戒請稍減天淵之澤庶勉傾葵藿之忱令臣子奎照奎耀赴闕祇領已足爲儒臣榮幸矣當蒙

俞允屆期率兩子至香山 靜宜園宮門恭候內
使頒出

宸章扁額並壽佛玉玩陳設綢緞各九件命兩子
率鼓樂導引至舍設香案叩頭供奉

聖製詩曰積善多餘慶家聲定圃留材能肯堂構
治足紹箕裘爲政誠無忝殫心實有猷香山壽星
現大衍始添籌同列中未有以五十

賜壽者非常異數夢寐難安而

御詩中呼先臣以字而不名尤曠典也

乾隆年間每歲臘月二十一日 寧壽宮後 符

望閣下

賞飯入座者

御前大臣

御前行走蒙古王貝勒等其時

御前大臣多兼軍機大臣者故漢軍機大臣亦得
入座嘉慶年間無

御前大臣兼軍機大臣者先仍

派入後軍機大臣皆不與余於甲戌年起每年蒙

派蓋

特恩也

南海子舊有新衙門舊衙門康熙年間我高祖資政公提督其地奉

旨添建南衙門嘉慶年間和管理時奉

旨重新 正殿請

命名名以頤和書室並

諭曰乾隆年間在熱河曾以此名書屋今顏此額者取汝名也以視禾名書鼎名年榮尤甚焉

和以嘉慶壬戌秋隨扈木蘭

命佐榮恪郡王管理行圍事向例管圍者不許從禽

上特諭曰素知汝能射獵其射鹿以獻並

教以獻鹿之儀和感激奮發刷羽抨弦勉力從事於是年八月廿六日射獲一鹿獻之蒙

恩賞穿黃馬褂詞林榮之後以降官革去丁卯秋復隨扈灤陽

上御宮門閱侍衛射鵠

命和同射向例侍衛射鵠五發三中者始蒙

恩和僅中二枝又蒙

賞穿黃馬褂凡此皆破格

恩也

向來

命在紫禁城騎馬之大臣多年逾六旬官至一品
者和以侍郎於嘉慶甲子冬

恩賜紫禁城騎馬時年三十有四

寵榮極矣

和荷非常

寵遇除常例外所

賞有紅絨結頂冠明黃面貂褂明黃辮朝珠明黃
辮大荷包十二章蟒袍四開袂蟒袍鎖子甲明黃
帶長柄腰刀等物不敢服用惟敬謹尊藏俾我子
孫世守之

和於嘉慶庚申奉

命抄錄平日所作古今體詩進

呈辛酉充江南試官回又

思齋集卷一
命呈進一路紀行詩詩中有秋風淡淡路迢迢句
上改爲蕩蕩以淡淡似春風也

考試大小九卿自二品至五品京堂始於嘉慶年
間歲庚申和任少宗伯以母老未與試越三日
仁廟詢曰日前之考何以未見汝文卽以實對
諭曰此次不可無汝作應補之因請試他題

上曰汝所學朕稔知無庸另試卽以前題回家補
作翌日進呈但須附以奏片申明奉詔否則恐黃
門官不敢擅受也是秋主試北闈至戊辰偕桂文

敏同試寅刻領題和於辰刻交卷

上于次日諭曰汝日昨寫作匆促應讓桂芳居首然亦不至過低抑之第二隨惶悚叩首而退孟秋月

上秋獮駐蹕灤陽和未扈從七月杪奉

派易水查工屆期具摺附報恭遞摺至適值

簡命順天主考和名在內因扣除不另易滿員僅曹文正潘芝軒二公入闈揭曉後長子奎照獲售九月迎

鑾於兩間房併謝子中式

恩蒙于行殿賜對

諭曰朕豈不憶及汝應查工復令汝充主考乎特
簡用乏人耳及閱汝摺因思乾隆年間每有專用
漢員之時故但除汝名不復添派孰知是汝子應
中耶和惟頂感泥首而已是歲文敏未獲衡文和
於己已復主禮闈乃知

聖明不測之用迨癸酉年以後官一品不復入考
矣

睿廟披閱章奏過目不忘和於嘉慶辛酉典試江南已事回京

諭曰江南試題首爲卑宮室一句是紀本年直隸水患孟子題放勳曰至如此與順天題同汝應出有末句卽此可見同心同德和惟有叩頭感服而已

嘉慶年間有以日珥爲頌者

睿廟示和曰天道在常不在異日珥何足賀因推及數學曰君相固不可言命汝已作六曹貳卿亦

不當聽術者言占休占咎在汝自爲而已和跽而識之不敢忘

睿廟嘗示和曰往年戒專擅其時其勢不得不然今臣工避此名遇事唯諾推諉殊非事君敬事之道試思任事之與專擅闕冗之與鎮靜差之毫釐謬以千里汝素非因循疲玩者流故以示汝汝當將此意述於同列故每於公所敬謹宣布

嘉慶己卯秋

睿廟幸灤陽

御騎誤蹶致傷右腕和時留京辦事具摺請息筆
墨勞奉

硃批每日批摺僅一二十字一切留心調理卿毋
望念勤政之心無一日或懈卽此可仰見矣
睿廟聰明睿智不能殫述試舉管窺可徵全體庚
辰三月兵部遺失行在印

命會同比部讞鞫七日而不得其情適

召見次子奎耀諭曰汝父當年在天津審辦田科
一案犯之狡供耐刑迥異尋常尙能得實何以印

案多日不能成讞田科事隔十五年不獨未忘案由並能舉犯人名姓真天縱也

田科者天津蠹役也乾隆末以故殺人不承地方官遂以鬪殺論次年卽遇赦鄰有御車者張起妻趙氏頗少艾嘉慶十年冬張外出遺趙在家科乘間起意圖姦遣同院居住之張守亮先往通信入夜科往欲行強趙持剪相拒反爲所奪亂扎殆斃令守亮以繩縛項拖入海河水窟中以滅其跡守亮以冰堅難鑿復拖回科張皇

歸其兄會姪得祥見其身有血跡問得實科賄
囑營兵地方匿報適起回赴縣呈明科忽認忽
翻不能成讞會乘機救弟誣指起弟發殺嫂赴
京呈控和奉

旨審辦而科日夜茹刑堅不吐實其家屬又逃匿
嚴飭緝拏到案各悉前情質之會俯首無詞但
稱救弟情切從而加功之守亮供認如繪仍熬
審至六晝夜之久科始輸服取筆自書名押於
供詞之末犯之狡至此極矣

嘉慶辛未次子奎耀成進士朝考閱卷日桂文敏至園居和接見云今日散直較晚何尙枉顧荅云非過談也奉

旨來爲告知公子名已入選俾先得聞爲快也當卽向上免冠頓首

嘉慶戊寅春大考翰詹次日蒙

召入示曰汝子奎照奎耀試作耀當在二等照次之今日閱卷未嘗宣露一字俟拆封後看若何及定等第耀居二等照列三等仍爲滿洲第二名越

曰

聖駕詣東嶽廟

命小黃門傳

諭云文章自有定評日昨所斷竟不爽當卽叩頭
感激欽佩無地

驄馬者喀拉沁公今晉貝子瑪哈巴拉所贈也嘉
慶壬戌秋乘之卽鹿得邀

天寵賞穿黃馬褂癸酉九月白澗途中聞京城有
警奉

命授執金吾卽回京擒捕逆黨未初行戊初抵京
三時中行百四十里次日卽獲首逆林清並逆戚
董國泰安住此皆

聖主威福所致而余以書生得軍功加級榮莫大
焉皆馬之力也寫圖徵詩以酬之烏乎能已

余未第時因倉有海運名卽注意於運務迨入翰
林後每於清秘辦公之餘輒閱永樂大典凡有元
一代海運事宜手自摘錄彙鈔成冊藏之於家歷
數十年每以河工爲患糧艘挽運維艱時思海運

而未敢輕舉也道光初年任大司農綜計天儲十年後或不繼百計籌之如倉存豆粒官用較少每歲所餘嘗有朽變因思大小官員孰不餮養騾馬奏請于祿糈搭放豆石又以親郡王等俸米歲支最多而各王公家向皆售於糧店奏請每季支放折色是時聞瀋陽河南粟米豐收先致書于將軍巡撫商及採買得有覆音以其時市價賤於官價訪問商民樂於從事然後奏請兩處各辦四十萬石閩督孫文靖聞之書來云是歲臺米亦豐收閩

浙兩省足敷接濟十萬石可浮海來當卽促其速
運以時價售買商人踴躍而歸適南河水路阻滯
盤剝官糧粒米狼戾勢不得不行海運而不能顧
恤人言也疏凡兩上仰蒙

宸斷飭江督蘇撫琦靜菴陶雲汀等籌辦余在部
中督屬經理天佑吾

皇迅速蒞事一百六十餘萬石南糧安穩入倉較
之元季初行僅得數萬石後亦不過數十萬石明
季初運三十萬石最多至七十萬石相去何啻倍

莧其中亦間有漂失者然止耗米八百餘石遠不
敵往歲重運所失之多其事之原委章程押運之
人航海之路詳見賀耦耕所刊之海運全案中而
和蒙

恩賞用紫纁尤爲非常

榮寵

高祖資政公在康熙年間家道豐裕樂爲善事未
登科第而深以讀書望後人請堪輿卜地數月之
久告曰某處之地出相某處之地出將請擇之資

政公曰吾皆不用請爲吾卜一世代秀才地足矣
堪輿對曰居停相待數月情意深摯吾何忍乃以
亮馬橋地獻問以若何則曰此真秀才地也資政
公卽不復疑以重價購成堪輿復曰公真長者此
地不獨發科甲且享富貴謂秀才地者試公耳此
地葬後十五年當小發三十年當大發果於雍正
二年甲辰伯祖東溪公開科乾隆二年丁巳先世
父文恭公先文莊公同入詞林皆至一品余不才
得被餘蔭亦由翰林洊至叅知任戶工兩部多年

兩司崇文門稅務一司左翼稅務所謂發科甲享富貴前言俱驗矣

李開陽者山東臨清州人精堪輿嘉慶丁巳賢貿來京往尋瑛夢禪叟以本省撫軍延爲擇日修大堂止之不可藉詞回里中潛詣夢叟屬以書戒之云修造禍且立至撫軍者伊江阿夢叟弟也伊不韙其言于戊午興工己未卽因事降官遠行余因識其人一長者也遂與定交辛未冬先妣經太夫人見背卜葬期於十二月李君聞信自鄉來唁且

阻辛未年葬事余告之曰某今失恃恐此後爲東
西南北人不獲親視窀穸何以爲子故欲定期在
百日服內李曰所擇之期亦平善惟與祭主官有
傷余應之曰果爾則無改期及至葬李同居丙舍
一一料理復告余曰不出半年當降官然別無礙
嗣于壬申五月以武英殿刊書錯誤降三品形
家言未可盡廢但須得精於其道者耳

余家自東省入北京卜牛眠地於朝陽門外六里
屯之東豆格莊之西以葬七世祖母墳東南建屋

宇時花木居然一小園康熙年間土人卽稱之曰石家花園先大父偕弟兄常居焉其時桐城方恪敏公觀承與大父爲布衣交並課文恭公讀暇曰杯酒論文極友朋之樂一日思歸皖省設餞於亭適百花正放主向賓定重來之約指亭前花曰來年花放時可復執手言歡及屆期花放而人不至我祖因名亭曰問芳未幾恪敏公來復設酒於亭公知名亭之由感主人意因以問亭易宜出舊號此園房屋歷久傾圯花木悉摧先文莊公以力不

能復舊觀僅將陰地圍墻數百丈新之又逾三十年余遵先志復新之

大伯祖東溪公雍正甲辰舉人以詩酒自豪強年下世雖著作等身而柏園無人碎玉零璣所存無幾惜哉

二伯祖東村公雍正年間舉孝廉方正而徵不應詩入少陵之室而稿不存與李鐵君馬大鉢王蘭谷陳石間橘洲昆仲諸先生交時稱燕山十布衣生子二長卽文恭公次近亭先生生而駢脅八歲

能舉石重四鈞冷金門爲畫虎子圖名公鉅卿咸
有題詠

先大父光祿公隱於疾寄身隴畝賁志詩書友朋
欵洽極道誼之歡昆季倡酬備天倫之樂文莊公
同懷四人皆由科目出身文莊公文章事業國

史載之綦詳三季父吳齋先生乾隆壬申秋成進
士由郎署官至盛京侍郎四季父野溪先生卽
於是年春膺鄉薦由縣令官至貴州糧儲道五季
父仁圃先生乾隆癸酉舉人官至內務府郎中以

年老休官至嘉慶癸酉重宴鹿鳴順天府循例入奏

睿廟念爲文莊公胞弟和之胞叔

特加三品卿銜併於

諭旨內言之一門骨肉疊荷

殊榮錫類推恩有加無已從兄英貴姪廷瓚雖各舉孝廉惜官俱不顯從兄英林以選拔貢生未經錄用且俱不永年未能圖報於萬一也

先大父授先公四子書每背誦一字不訛後仍讀

百遍嗣于雍正六年初設 咸安宮官學選八旗
內務府俊秀子弟入學讀書先公甫十齡在選中
同學者先世父文恭公阿文成公舅氏原任中丞
良公諱卿中第後始出學至七旬時誦經書盡卷
不遺一字每示余曰皆家塾官學之力也先公七
十壽文成公贈詩四律有絳帳傳經羣弟子青燈
話舊兩書生高第要爭三級浪頭銜早領一條冰
手內但提量士尺胸中原有活民書我知宗伯文
章壽人樂先生杖履春等句序文起句朱履分行

思齋集卷一
此日稱觴之客白頭難得當年同學之人先公學
力老輩交情具見於此

先文莊公喜錄格言尤喜朱柏廬家訓嘗命熟讀
曾於漕帥署中以清文繙譯鏤版以廣其傳爲教
我滿洲知所法也

文恭公書法兼歐米之長制義則直溯成宏士林
推爲宗匠昔文莊公自閩撫拜大宗伯歸旋充
上書房總師傅從質莊親王處得文恭公制義底
本付諸剞劂近從弟觀瑞復重刊樂山堂遺稿以

壽世惜書法無存未能勒石觀瑞爲嘉慶庚午舉人任粵東州縣今以觀察需次江西

外祖瑪公諱善官學五品教習一日至學聞先公讀書聲異之入見益異之歸向外祖母云有官學生某非常人也問其年則與吾女同欲締絲蘿惜汝不得見其人外祖母荅曰以吾兒同學友何不令兒延至家一飯因以定婚吾嫡妣傅察夫人于歸後外祖嘗向人稱善於擇壻云

余元配薩克達夫人年十七歸余極爲先文莊公

先妣傅察太夫人經太夫人所鍾愛問安視膳之餘躬親鍼劑未嘗涉獵文墨年三十二始識字亦不過日用飲食稽覈臧獲之出入而已後見傅凱亭高且園二公指畫心竊羨之頗有領會偶一摹仿爲余忘年老友瑛夢禪居士所許可遂專心習之雖家務紛繁必日事臨池不少輟蓋夫人體素弱心過勞欲藉此以頤養耳余字之曰介文顏其所居曰觀生閣

余自六歲時得嗽疾三冬燈火工夫闕廢者十年

成室後立苦志讀書每侍先文莊公就寢輒夜讀
薩克達夫人理針黹以佐曾屬畫工吳興孫勉亭
寫秋燈伴讀圖留示後人後黃左田見之又寫夜
燈清課圖以贈孫工筆黃則寫意而已

道光三年冬

上册封佟雅

皇后和爲持節使王大臣例賀於外王妃命婦例
賀於內妻室薩克達氏以舊日跌傷腰骨故每歲
蠶壇常引疾至是仍不能行六肅禮先期奉

諭旨徑詣

后宮行家庭禮屆期偕妻同入東華門觀者豔
之程春海編修舉唐權文公與縣君同朝興慶宮
故事取其詩句屬爲比翼朝天圖

先文莊公丙辰丁巳聯捷座主皆福龍翰先生余
壬子癸丑聯捷座主皆劉石菴先生先公於乾隆
甲子充順天武鄉試主考乙丑充文會試同考官
余於嘉慶戊午充順天武鄉試主考己未充文會
試同考官先公在翰林學士任僅九日晉內閣學

士余在詹事亦僅十日晉閣學余年二十有八任少詹事次子奎耀任少詹事亦二十八歲余二十二歲舉於鄉六孫錫章乙未秋闈中第年亦二十二此中因緣不可思議

先文莊公掌容臺者十二年與達香圃紀曉嵐劉青垣三宗伯同事余於嘉慶庚申追隨三先生亦列春官迨癸酉重任時乃鐵冶亭王春甫兩先生爲大宗伯秀楚翹胡西庚汪瑟菴爲少宗伯鐵出王門胡汪秀三公及余前後皆出鐵門其時有春

官六座六師生之諺故製聯留署其句云典禮奉
寅清粉署重來愧說箕裘延世業同堂聚師弟薪
傳遞衍始知桃李屬春官

部院各衙門多有康熙雍正乾隆

御筆額嘉慶年間頒各衙門箴用勵諸臣惟步軍
統領衙門

御製箴末云汝和欽哉殊深榮幸

西華門外福佑寺後殿供奉

神牌書

聖祖仁皇大成功德佛九字背面書

聖製五律一首地爲

龍潛舊邸後改梵宇坊書澤流九有人傳爲雨神

廟云

高宗純皇帝誕生於 雍和宮或相傳爲 獅子

園此

仁廟遺詔恭擬者所由誤也然前於丁卯歲

實錄館進呈

聖訓首載

誕聖一條

仁廟卽以爲疑

飭館臣查覆經劉金門少宰鳳誥奏本

聖製雍和宮詩將

聖集夾簽呈進

上意始解而

聖製詩注謂予實於康熙辛卯生於是宮也則知獅子園之說其訛傳久矣

國初滿洲大臣近臣每年春秋跳神前期釀酒卽

不入直家有子女出痘者亦不入直所以重祭祀
蕃戶口也

大內合符陽文也留京辦事王大臣值宿所守者
餘皆陰文大城則正陽德勝二門禁城各門皆
有之步軍統領家亦藏之余於嘉慶癸酉九月任
事開篋檢視則有雍正年間舅舅隆科多議奏清
字摺一冊內稱京城倘有警白塔山信礮一放號
旗一起王大臣文武百官及兵丁等各趨所定之
地守衛聽令九門皆有礮桿何門緊急先放何門

之礮旗隨起夜則懸燈一門礮起各門礮聲咸應爾時曾將科條頒存各衙門歷年既久人無知者余因按照原摺譯漢使人易曉奏明發刻謂之白塔信礮章程頒給京城大小文武各衙門一體存案可知當日之爲此奏老成謀國不諱言兵也太和門外東爲石亭西爲石匱一日

上白

天壇還宮見之以問南書房翰林莫知其名或以語彭春農春農舉閱微草堂筆記中云曾聞之

督三殿工者言其中多朽栗紀文達公斷以爲嘉
量後穆鶴舫親往視以告春農言匱之蓋非構架
不能啟文達之說亦未確春農曰地近起居注
其石室金匱之意乎是或一說也

坤寧宮食肉惟王貝勒等及一品大臣方列名牌
請

派二品者惟軍機大臣及值南書房者方與

每歲除夕保和殿上元正大光明殿筵宴蒙

古親藩滿洲一二品武職大臣同許入座嘉慶七

年上元

特許一品漢大臣入宴後以爲常

賜福蒼生筆

聖祖仁皇帝舊物也余癸丑入翰林課錫福蒼生
賦以題爲韻同人皆不得解請之館師知爲康熙
年漆管大筆之名故事

聖駕於每歲十二月朔詣闡福寺升香回建福
宮以此開筆書福字一又易筆書福字九因闡發
此意迨余入南書房親見此筆亦模製也而純

粹異於他毫想見揮洒如意漆管金字刻賜福蒼
生四字嘉平朔日開筆乃在重華宮此筆所書
福字無定數惟珍重不多書專貼宮庭以志新韶
集慶道光三年臘月
上御此筆書福字以

賜和實出非常

恩遇既裝成敬識於末復恭紀以詩

高廟重排石鼓文用幸翰林院例規定首章末章
餘命彭文勤公足成之於

聖製序中載明故胡西庚尙書後石鼓賦有餘字補戈更進馬卿而視草一聯蓋指此也

乾隆御定石經其原本爲江南布衣蔣衡一手書於

聖駕南巡時呈進者貯之懋勤殿有年矣歲辛亥

上命以之校刻石經初

派總裁以吏部尙書金簡司劖劂以彭文勤公司考正文勤又面奏以石經爲

本朝鉅典金簡不由科目出身臣學尤舛陋兩人
列銜恐不足垂信萬世請增

派總裁官乃益以和珅王文端劉文清董文恭然
聖意猶責成文勤一人也是年五月

上幸避暑山莊將啟鑾

諭文勤曰汝不隨扈可竭長夏力將 天祿琳瑯
所藏宋槧各經本與監本坊本校勘異同於石經
內改從宋本此文勤所以有考文提要之作進呈
後

上親揮宸翰於卷首並鈐以

御寶已奉

命刊行矣逮石經藏事惟文勤一人加官保銜在
事者俱未議敘和珅乃集翰林之能文者數人成
提要舉正一書大意以鄉僻士子難責以概從宋
本爲辭

上亦允所請和珅必欲將提要銷燬

上顧而笑曰此時不刊行留爲將來經生聚訟之
端亦無不可和珅乃取

旨將舉正繕寫三本一存懋勤殿一存翰林院
一存國子監而提要竟不刊行并石經內它從坊
本者甚夥歲丁巳乾清宮災藏書付灰燼宋本
面目猶賴提要以存始知經籍之光歷劫不磨至
己未後文勤奏奉

仁廟面諭准刊於是阮芸臺相國乃屬許周生主
政刻於浙中

嘉慶丙辰

聖製新正千叟宴畢仍茶宴廷臣於重華宮得

詩二首一韻韻用麻部

詩內押嗟字咸以爲難彭文勤公先脫藁時和珅倩人代作所和嗟字意不愜屬公爲改正公易以帝典王謨三曰若騶虞麟趾兩吁嗟二語和珅素與公不協是日亦爲嘆服

高廟十全武功其煩兵力至再者三聞之前輩不記爲準噶爾爲金川爲廓爾喀也但云

上以武功再定命題聯句

聖製出聯曰一之謂甚豈可再諸臣皆愕貽無以

對紀文達公應聲曰天且不違而況人此不獨用
成語如已出而君臣應對語氣亦合真天才也
嘉慶甲子以毓慶宮命爲題聯句

御詩下適朱文正已散直和同趙謙士敬錄一通
送文正看

御詩出句有毓慶承

恩毓嘉慶句下應臣工敬對和對云 壽皇垂裕
壽

今皇僅示謙士而未書付文正次早文正入直向

思前堂言
和云某昨在舍對一句君以爲如何問之卽和所
對七字相視而笑是曰文正以對句面奏

上嘉之

嘉慶戊辰冬

睿廟於舊藏書畫內得見

純廟乾隆庚辰正月二日所寫歲朝圖題以七律
二首首句樽木初傳少海紅欸末有以誌新韶嘉
慶六字

特製五律一章 內廷王大臣咸有恭和之句其

時和與戴文端在懋勤殿各據一几凝思揮毫
和詩先成文端索看草稿有筆真通造化兆早協
人天一聯文端笑以稿示十字全同遂易之
御前大臣初拜者學習行走或踰年或兩三年降
旨實授軍機大臣初拜者學習行走後不復降實
授之

旨惟穆鶴舫於道光七年在軍機大臣上學習行
走至八年實授

諭旨初皆由內閣康熙中有南書房翰林撰擬

者雍正七年青海用兵始設軍機房乾隆初改名總理處三年復名軍機處其章京例用內閣中書舍人改庶吉士則不復入改六曹御史給事中遞遷卿寺至都察院副都御史內閣學士入直如故擢侍郎乃不復入惟滿洲章京如保公成以少宰勒公保以少司馬鄂公容安以侍講漢章京如張公若靄以庶子戴文端以修撰仍入直皆特旨非故事也嘉慶間始定官至通副理少者出軍機科道亦不兼行復改各衙門咨送不似向時

之專用中書及指名取知名士矣

父子任軍機大臣尹文端公與其子慶文恪公傅文忠公與其次子福額駙四子福文襄郡王六子福尙書阿襄壯公與其子豐公盛額納公延泰與其子長威勇公余長子奎照亦繼余入軍機

滿蒙翰林出身任軍機大臣者前惟尹文端夢午塘那文毅繼余後者則桂文敏穆鶴舫文孔修及奎照而滿漢同堂五人如現在之潘芝軒王定九及鶴舫孔修奎照皆翰林尤從來未有

軍機處舊懸一堂和氣額

世宗憲皇帝墨寶也 圓明園軍機處所懸則鉤
刻者嘉慶年間慶丹年相國奏繳墨寶禁中軍機
處亦鈎摹刻木 南書房向無額余於嘉慶甲子
春旣求諸城劉文清公書翰林院瀛洲亭額並求
書 南書房額特識其緣起於此

初授軍機大臣同列具摺奏請某新入許看摺奏
否候

旨遵行乾隆年間如副將軍侯富德東省人以軍

功得入軍機而不許看摺奏似此者不一若雍正
年間每日先見鄂文端張文和二公議事再同見
諸軍機大臣散直後文和在私邸與章京一人擬
諭旨次日呈進發抄其時公長子晴嵐先生試問
章京亦不敢露一字

每歲立春日科甲出身之軍機大臣偕南書房翰
林在懋勤殿跽進春帖子詞大學士及上書
房師傅不進詩詞一體得筆墨

賞嘉慶年間兼及內廷親郡王

南書房行走自大學士至卿貳皆稱翰林每歲新
正二日

命題聯句乾隆初年諸臣咸集 宮闕依次聯吟
有方構思而

上巳代成者後則 南書房擬成全首每四句下
署一臣名先期將大學士尙書侍郎銜名繕寫綠
頭籤 南書房行走者卽寫 南書房翰林共
派二十八人與宴者二十人不與者八人與宴者
在 重華宮東廂和詩不與宴者在外和詩亦於

卽日交卷嘉慶年間添入 內廷行走之親郡王
繕寫紅頭籤請

派派出者入 重華宮西廂和詩軍機大臣及內
務府大臣非科甲出身者與宴得

賞而不和詩所和乃

御製復成二律也聯句詩七言排律七十二韻宴
後仍

命南書房翰林一人書以勒石擬聯句詩序者則
有錦綺蟒袍之

賜入重華宮和詩者則有硯池畫幀玉玩茶杯等物之

賜

國朝慶典臣工各進冊入選者貯之

大內齋宮有排架圖便于查取嘉慶年間奉

旨移于皇極殿乾隆初年尙不誇多鬪靡如甲

子

幸院鄂張兩掌院各進七律四首前有序文合爲一冊冊用白紙其餘冊頁大小亦無定式至錢香

樹先生所進冊多白紙自書行楷相兼脫字卽注於旁此可知前輩之真率也

康熙年間命文學侍從之臣日進講章

上親臨咨詢習以爲常若值陰雨或嚴寒酷暑講官偶未見

上卽諭曰豈有因天時寒煥輟講之理後應逐日進講無間仰見

聖學淵冲孜孜不倦凡講章皆存 南齋今已盈箱累篋其中頗有前輩典型足資效法者惜余趨

直時公務殷繁未暇細檢至今猶怏怏

向來大小臣工凡賡和

天章其詩摺詩片皆存 南齋至嘉慶四年奉

旨統交翰林院收貯從此名流華翰宿學篇章悉
爲人所剽竊更換不復覩蘭亭真本矣

椒屏歲祝故事每屆歲除 南書房翰林循例爲

之椒屏用素絹縱一尺餘橫二尺餘每幅各題四

字於上併系以贊如用化日舒長四字其贊語卽

隱切字意署欵臣某敬題題畢交如意館就所題

字意先黏椒於絹復翦五色綢綾作四嬰兒狀一
持畫一執旗旗上畫日形一捧書一手提長字別
無點綴裝成錦邊挂屏約二十餘幅每幅語句不
同嬰兒所執亦各異皆以此類推而附會之歲祝
乃五色絹對長四尺濶一尺畫歲朝圖各題五字
上下聯屬對工整但用臣某章而不署款亦交如
意館裝成軟屏約二十餘對每對字畫各有區別
均於掖庭分挂其制每歲更換屆期用黃摺片
繕擬先呈

御覽然後發館裝潢其黃片存於懋勤殿百餘年來元臣故老筆蹟頗多足資樞楷

佛背光每歲嘉平中正殿更換佛像每像背後對佛光處各書佛名號用清字蒙古字西番字漢字四體前三體字畫各有所司其漢字則南齋翰林事也

南書房隨時拜

賜稠疊便蕃更僕難數冬令時

賜皮衣和蒙

賜貂裘不下二十襲若乾隆年間彭文勤公以集
千文恭跋

御製全韻詩有元狐端罩之

賜以表進

御製十全武功詩文集有元狐爪仁褂之

賜又超出諸臣之外矣

嘉慶甲子秋隨扈灤陽蒙

恩賞穿綠皮押縫靴

特恩也逾數年後降

恩福豈僅已

卷上

旨御前大臣軍機大臣內務府大臣每遇隨扈俱准穿綠皮押縫靴遂爲例

南書房翰林與內廷行走者皆出入乾清門懋勤殿行走者不論科甲與否由大臣舉薦入直同造辦處匠役出入內右門所得

賞賜較匠役有加而與翰林迥別嘉慶四年改內閣侍讀學士趙秉冲爲翰林其缺以戶部主事黃鉞充迨九年黃改翰林與趙皆兼懋勤殿行走由是遂不舉繼者

睿廟賜慶相桂七十壽詩有名重

三朝三相國句蓋尹文恪公泰在雍正年間入相
尹文端公繼善在乾隆年間入相

御書聯語以張延賞媿之父子祖孫三代宰相溯
李唐至嘉慶年間亦只再見可爲搢紳佳話

滿洲編檢出身而大拜者自乾隆年間尹文端公
後至道光十六年穆鶴舫繼之余與阿文勤公均
列參知耳鶴舫鄉會皆出余門其所歷官階及沐
殊賞多與余同詞林傳爲盛事亦門牆之光也

國朝狀元官至大學士者順治朝傅聊城以漸呂
武進宮徐長洲元文乾隆朝于金壇敏中梁會稽
國治王韓城杰嘉慶朝戴大庾衢亨道光朝余同
年潘芝軒世恩共得八人若乾隆年間莊番禹有
恭僅叅知耳

乾隆年間史文靖任兩江總督陳文恭任兩廣總
督先文莊公任順天學政因考試八旗生童請迴
避不許朱文正祖籍蕭山任浙江學政亦自請迴
避不許而覃溪先生及近日白小山主順天鄉試

皆破格簡任也

國子監祭酒奉使外出向不請署嘉慶元年胡西庚先生以祭酒乞假繼之者爲陳伯恭先生嗣陳視學湖北無攝篆者至丁巳冬胡銷假回京以次年

聖駕臨雍祭酒當進講乃

命胡署祭酒是年胡以未經補缺之官典山東鄉試卽留學政後劉金門先生以太常卿署劉於庚申典湖北鄉試陳梅垞先生又以少司農署直至

伯恭先生辛酉緣事乃

簡放吳穀人先生計五年中至是始有實任後李芝齡以祭酒視學浙江乃以學士對調道光壬午何仙槎以祭酒典山東鄉試未請署旋視學山東其時有起服候補之祭酒張四香在京當事無知丁巳年事者乃以彭春農對調自後則試差亦請署矣